

# Powšitkowne WOZJEWJENJA

njedźelu, 3. apryla 2016

## **Nyšpor z požohnowanjom motorskich**

Popołdny z požohnowanjom motorskich zahaji so njedźelu, 10. apryla, w 14 hodź. z nyšporom w Ralbičanskej cyrkwi. Přizamknje so wulět.

## **Bratrowstwo hraje w Radworju**

Přichodne předstajenje dźiwadłoweje hry „Hdyž kokula woła“ budže njedźelu, 10. apryla, w 16 hodź. na žurli Radworskeho hosćenca „Meja“. Dźiwadłowa skupina Bratrowstwa wšitkich wutrobnje přeprošuje.

## **Přeprošenje na Mačićnu akademiju**

Na temu „Stawizny a stawiznički ze Serbskeho seminara w Praze“ přednošuje dr. Birgit Mitzscherlich, nawodnica archiwa, biblioteki a pokładownje Budyskeho tachantstwa, štwórtk, 7. apryla, w 19.30 hodź. w Budyskim hosćencu „Wjelbik“, Žitna 7. Přednošk budže w němskej rěči, zastup je darmotny. Stawizniska sekcija Mačicy Serbskeje wšitkich zajimcow wutrobnje přeprošuje.

## **Nalětni koncert Budyskich gymnaziastow**

Chór, rejwanska skupina a instrumentalisća 1. serbskeje kulturneje brigady přeprošuja na swój nalětni koncert sobotu, 9. apryla, w 17 hodź. na žurli Budyskeje piwarnje. W programje zaklinča tradicionalne a načasne pěsnje, předstaja so wšelake rejwanske sceny a instrumentalne přinoški.

## **Družki na zjězd katolikow**

Na zakónčacej Božej mši 100. zjězda katolikow Němskeje, kotraž budže njedźelu, 29. meje, dopołdnja na Augustusowym naměsće w Lipsku, su holcy prošene, zo bychu jako družki sobu začahnyli. Wone změja w přednim dźělu swoje městna. To wobkrući Christina Vogl, sobudźělačerka w zarjedže zjězda za liturgiski wobłuk. Wona doda, zo je tež planowane, zo so jedna próstwa w serbskej rěči přednjese.

Družki wot 9. lětnika su prošene, zo bychu so na tutej kemšach k wjetšej česći Božej wobdźělili. Jězbu z busom do Lipska njetřebaja wone zapłaćić. Wotjězd budže něhdže w 6.30 hodź. Wone měli hižo zdrasćene być. Po kemšach, kotraž zahaja so w Lipsku w 10 hodź, so zaso domoj nawróća. Zajimče njech so prošu hač do póndzele, 18. apryla, w redakciji Katolskeho Posoła, telefonowe čisło (0 35 91) 55 02 12 abo z mailku na [Katolski@Posol.de](mailto:Katolski@Posol.de) přizjewja.

## **Z busom na zjězd katolikow**

Štóž chce sej na 100. zjězd katolikow Němskeje do Lipska dojeć, ma k tomu z busom dvě móžnosći. Radworske Šmitec wozydłownistwo poskičuje jězbu sobotu, 28. meje, kaž tež njedźelu, 29. meje. Zajimcy měli so pola Šmitec w Radworju přizjewić, telefonowe čisło (03 59 35) 28 60.